

女红余志

龙
辅

文硕阁

wenshuoge.com

目录

关于我们	3
《女红余志》小引	5
龙辅《女红余志》目录	6
《女红余志》卷上	7
《女红余志》卷下	18

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

《女红余志》小引

余细君龙氏，性夷淡令淑，兼善属文。外父为兰陵守元度公后，家多异书。细君女红中馈之暇，辄细阅之，择其当意者编成四十卷，时置几头，命曰《女红余志》。今年属余游宦京师，细君精差其最佳者，手录之，仅四十之一，附以诗选，内余囊中。昔徐淑能文，秦嘉方轨，文君擅词，相如比肩，余乃自幼束于制科，深有愧于古人，兹常勉焉，以副吾细君赠是编之微指耳。

武康常阳序于太平官舍。

龙辅《女红余志》目录

卷上

自序 圆魄 琼浆 绿绮窗 珠窗 椒房 桂宫 红壁 贞女引 回风曲 白纻歌 飞蓬引 碧弦
飞黄鬓 豪犀 金梭 宝镊 金笼 玉云 郎当 钿 莲枝带 寒蛩褥 赤珠 承云 裙巾 镜 玉拨
生香屐 太华毡 熨斗 剪刀 尺 辟尘庐 磬盃 莫难珠 珊瑚 翠毛 踟蹰 璘籍 钗帔 索钩 杵 帐
琵琶 玉镜台 针 衣带 圆顶簪 玳瑁床 玳瑁屏 烛 扇 卖眼泪 眼语 黄姑 阿侯 玉奴 异姝
柘弹 印检 暮妆 诗女 梦兰美人 毛女 佳次妇 香丸妇人 侠姬 水仙花诗 新蒲 兰 竹 梅
琅琊草 花见羞 倏 嘉蜂 黄鸟 鼠

卷下

自序 中秋 暮闺 帔 戏示女伴 偶成 晓景 荅外送外 夏闺 莲子寄外
莲子诗比成自觉丑甚戏题此作以解发君子一笑耳 纪梦 寄外 书怀 题书斋 冬晓
春日三首 偶成 春日写怀 睡起 送外 寄外用前韵 写怀 寄外二首 恨 荅外 制履寄外 冬至
十一月初四日五鼓纪梦寄外 赠外 偶成 兰梅诗 荅外 寄外读书处 山中寄外十五首
送外 又为子夜歌

《女红余志》卷上

鄙观载籍，颇多僻秘，女红之暇，每一沉酣，推玄底妙，庶有别于瞽者。一日属君读何逊诗，不解「山枝咏新识」意，鄙闻之，笑曰：「彼奈何忘〈越人歌〉耶？『山有木兮木有枝，心悦君兮君不知』，政何所谓『咏新识』也？」因于间日稍有所识，以便观览，要多妇女家事。龙辅识。

圆魄

东阳诗云：「圆魄始降，晨离嗣之。光景倏忽，石火犹迟。君何不来，徒有相思。」

琼浆

〈游仙诗〉序云：「有仙童降于郊，进余以琼浆，味甘如饴，腾空而去。」故其诗有「琼浆且未洽，羽辔已腾空」之句。

绿绮窗

隋文帝为蔡容华作潇湘绿绮窗，上饰黄金芙蓉花，琉璃网户，文杏为梁，雕刻飞走，动费千金。

珠窗

唐玄宗武惠妃窗上皆挂明光之珠。

椒房

〈闺情诗〉曰：「含娇弄态出椒房」，则椒房不必尽指宫中也。

桂宫

陈后主为张贵妃丽华造桂宫于光昭殿，后作圆门如月，障以水晶。后庭设素粉罽毼，庭中空洞无他物，惟植一桂树，树下置药、杵臼，使丽华恒驯一白兔。丽华被素桂裳，梳凌云髻，插白通草、苏朵子，鞞玉华飞头履，时独步于中，谓之月宫。帝每入宴乐，呼丽华为张嫦娥。

红壁

田尚衣多病，文帝以朱砂涂四壁以辟邪，故谓之「红壁」。

贞女引

「贞女引」、「双思引」，一曲二名，即今梅花琴曲也。

回风曲

王母别汉武帝，升云，命长裾歌回风之曲。

白纈歌

沈约〈白纈歌〉五章，舞用五女，中间起舞，四角各奏一曲，至翡翠羣飞以下，则合声奏之，梁尘俱动。舞已，则舞者独歌末曲以进酒。

飞蓬引

飞蓬引取「首如飞蓬」意，思夫之曲也。

碧弦

女丸以黎洞寶香为琴，以昆山碧玉为弦，故曰「碧弦琴」。

飞黄鬓

元雍姬艳姿以金箔点鬓，谓之「飞黄鬓」。

豪犀

豪犀，刷鬓器也。诗曰：「侧钗移袖拂豪犀。」

金梭

羊侃姬张静琬，能织奇锦，有金梭、玉镊、伏兔、辘轳，皆人间所无之寶为饰。

寶镊

袁术姬冯方女，有千金寶镊，插之增媚。

金笼

青琴采桑，携金笼玉钩。

玉云

吴主亮夫人洛珍，有栳名玉云。

郎当

郎当，净栳器也。

钿

李听姬紫云，有金虫寶粟之钿。

莲枝带

荀奉倩将别其妻，曹洪女割莲枝带以相赠，后人分钗即此意。

寒蛩褥

翔凤因季伦见弃，听寒蛩心悲，因织寒蛩之褥以献之。

赤珠

吴绛仙有夜明珠，赤如丹砂，恒系于莲花带上，着胷前。夜行，他人远望，但见赤光如初出日轮，不辩人也。

承云

承云，衣领也。昔姚梦兰赠东阳以领边绣、脚下履，领边绣，即承云也。沈并八物为十咏，又有〈忆来时〉、〈忆坐时〉、〈忆食时〉、〈忆眠时〉四咏，俱为梦兰作也，当时传诵之。

裙

周昭王延娟以奇锦为裙，昼看成凤，夜看成龙，名「交龙鬪凤裙」。

巾

羊侃姬孙荆玉，拂履皆用轻丝合璧锦巾。

镜

李月素大镜名「正衣」，小镜名「约黄」，中镜名「圆水」。

玉拨

隋炀帝朱贵儿，插昆山润毛之玉拨，不用兰膏而鬓发鲜润。

生香屐

无瑕屐墙之内皆衬沉香，谓之「生香屐」。

太华毡

光武后阴丽华，步处皆铺太华精细之毡，故足底纤滑与手掌同。

熨斗

姚月华熨斗名「麟首」，黄金为之。

剪刀

潘炕姬解愁，有双龙夺珠之剪。

尺

吴主亮洁华，有杂宝黄金尺。

盈盈有画尺。

辟尘麈

无瑕当执辟尘麈，礼观世音，误落香垆中，火炽不及取，至今名为「无尘殿」。

磬盃

盈盈家奴婢皆用黄金饰礪盃。

莫难珠

李愿姬玄寶，腕绳恒贯莫难珠。

珊瑚

宋祔侍女数百，挂镜皆用珊瑚枝。

翠眊

临川王宏妾江无畏，善骑，马翠眊珠羈，玉珂金鑣。

跣蹠

梭一名「跣蹠」。

璘籍

蚕箔一名「璘籍」。

钗帔

燕昭王赐旋娟以金梁却月之钗，玉角红轮之帔。

索钩

〈崇兰馆序〉云：「绮幔高褰，结金索皆神麦之穗；珠帘不卷，悬银钩尽仙蒜之条。」

杵

杵之神曰「细腰」。庾信诗曰：「北塘细腰杵。」

帟

梁惠王为闲姬制鸾凤帟，焚百花香于内，则鸾凤俱飞舞。古老云：「鸾凤乃仙蜂血所染，仙蜂出休与山，其形如猫，爱花香，闻有异香，不远千里必食之而后返。」

琵琶

陈后主孔贵嫔琵琶名「怀风」。

玉镜台

淑文所寶有对凤乘龙玉镜台。淑文名婉，姓李氏，贾充妻。

针

许允妇阮氏有古针，一生用之不坏。

南华〈谢美人针诗〉曰：「同心欲制锦，岁月好磨礲。眼中如得线，灯下敢辞缝。」

衣带

桓豁女字女幼，制绿锦衣带，作竹叶样，远视之无二，故无瑕诗云：「带叶新裁竹，簪花巧制兰。」女幼，庾宣妇。

圆顶簪

魏文帝陈巧笑挽髻，别无首饰，惟用圆顶金簪一只插之。文帝目曰：「玄云黯霭兮金星出。」

玳瑁床

楚娘，名伎也，寝玳瑁之床，悬翡翠之帐。

瑯

瑯，妇人首饰也，诗曰：「明瑯间翠钗。」

玳瑁屏

阳文张玳瑁屏风，黄金为屈膝，长七尺，广二丈，可以卷舒。

烛

桀爱琰琬，宫中烛心至跋皆用异香寶屑燃之，有异彩，数里皆香。汤伐之，发其残跋，值万金。

扇

东阳尝赠所欢二扇，一曰「银花」，一曰「寄情」。后复归之，有诗云：「还君与妾扇。」

卖眼李白诗：「卖眼掷春心。」

〈观美女诗序〉云：「卖眼香屏之中，弄姿绿水之侧，及桃李之芳年，轻金琼之重体。」

泪

鲛人之泪圆者成明珠，长者成玉筋。

眼语

宠姐每娇眼一转，宪则知其意，宫中谓之「眼语」。又能作眉言。宪，宁王也。

黄姑

黄姑，牛郎也，冯妇，勇士也，皆以女名。

阿侯

语曰：「欲知菡萏色，但请看芙蓉，欲知莫愁美，但看阿侯容。」阿侯，莫愁子也。

玉奴

东阳诗曰：「夸腕绞罗袖，示音呼玉奴。」玉奴即梅奴也。

异姝

秦韩出异姝，娇妍委靡，消魂夺目，邻国购之千金，不许。

柘弹

〈春游诗序〉云：「夸柘弹于禽林，竞韩卢于兽苑。」

印检

南华笺云：「启印检而含情，睹题书而挥泪。」

暮妆

令娴荅徐悱诗有云：「落日照靚妆，开帘对春树。」一日薄暮，令娴忽作新妆，夫戏曰：「照靚妆不若更新妆佳也。」令娴大笑，为之罢妆。

诗女

玄甫远行，吴氏女思之，制吴思玄之曲，其辞曰：「金风响洞房，佳人心自伤。泪随明月下，愁逐漏声长。灯前羞独鹄，枕上怨孤凰。自觉鸳帏冷，谁怜珠被凉。」

梦兰美人

梦兰，古之美人，见《东阳杂志》。庾信诗云：「何年迎弄玉，今朝得梦兰。」

毛女

毛女字玉姜，精乘屩术，一披衽而游八荒。谚曰：「谁谓八荒远，玉姜顷刻返。饮我五色霞，食我三清饭。」

佳次妇

陆夫人好佛，尝梦三神人谓曰：「吾畀汝佳次妇。」夫人不识所谓。后其子一夕室中被盗，明夕少闲之三鼓，闻后园相击声，其子起覘之，则后垣已坏，残月中见一女子与一人鬪，其人力竭仆地，女子顿足探手提之，其形若飞遥掷去之。然后复下至门呼曰：「贼毙吾手矣。安寝。吾，佳次妇也。异日无相忘。」竟不知何人，里中自是无复夜警。

香丸妇人

贞观时有书生，幼时贫贱，尝为人佣作。一日至二鼓归，其母以馄饨一盂食之。有邻人陈姓者，乘酣嘻笑而来，侧目视其食，食已，复嘻笑而去，生颇不平之。又尝有共佣作者，与生不相能。一夕，伺于道观前欲殴生，生觉逃去。已而为人佣书，其家奴诬生盗其净巾中金，又有奴匿其主紧要文书，害生不能白，主怒杖之。人由

是多谤生无行者，生悲愤，归，取先人业肆之，业稍就，不虑贫苦矣。生一日闲步，经观音里，有一妇人姿甚美，生心动，屡回顾看之。有恶少年数人于路相谓此妇有邪行，语语有实据，生闻贱之，不复有相顾意。生后与妻坐烛下，偶及此事，妻曰：「此吾异姓之从女弟也。妾徒以君贫故，不敢与之往来，闻其独与一侍儿居此里，立身最高洁，亲戚俱畏敬之，岂宜有此？何等恶少年污蔑之也。」生闻之大怒，欲为报之。翌日，妇命侍儿来曰：「主母感郎君恩，虽未行最感之，即为郎君死无恨。幸与郎君有夙缘，后日可一见于某所第，未可向迹，尽欢有日也。」生如期往，果得望见，各以目逆之。翼日，侍儿复至曰：「主母治杯醴，屈郎君少坐。」及至，酒饌甚盛，几筵间所陈器皆人间所无。独命生坐中堂，饮半，侍儿负一革囊至曰：「主母所命也。」启视，则人头数个，颜色未变，乃向侮辱生者也。生惊，欲避去，侍儿曰：「郎君请无惊，必不相累。主母固预命以药物待之矣。」怀中出少药，白色有光，用小指甲每头弹断处粟米许，头渐缩小，至于如李子大。侍儿食之，吐核，亦李也。侍儿又曰：「主母恶恶少年，无须臾忘，亦欲假手于郎君。」生愧谢弗能。妇人又命侍儿进一香丸曰：「不劳君举腕，君第扫净室夜坐，焚此香于炉，香烟所至，君急随之，即得志矣。有所获须将纳于革囊，归勿畏也。」生如指焚香，随烟而往。初不觉有墙壁碍，行处皆有光，亦不类闇夜。每至一处，烟袅袅绕恶少年颈，三绕而头自落。或独宿一室，或妻子共床寝，或初就枕，待者执巾若麈尾、如意，围绕未敢退，悉不觉。不知生悉以头纳革囊中，若梦中，殊无畏意。于是烟复袅袅而旋，生复随之而返，到家，未三鼓也。烟甫收，火已寒矣。探之，其香变成金色，圆若弹，倏忽飞去，铿有声。生恐妇复须此物，无以复命，正惶急，侍儿不由门户，忽尔在前，取头弹药食之如前。生告曰：「香丸飞去不可觅，奈何？复须否？」侍儿曰：「得之久矣，主母传语郎君：此畏关也，此关一过，无所不可为，姑了天下事，共作神仙也。」后生与妇俱徙去，不知所之。

侠姬

修容尝言，幼时其母好善，属里中盗大起，阖门惶骇。忽一老姬至，曰：「汝家从来多阴德，盗虽乱，吾能匿汝，无得骇也。」袖中出黑绫二尺，裂作条子，每人令系一条于臂，曰：「不必备饮食，第随我行耳，家中一切无所损。」修容母子随至一道院。老姬指一神像曰：「是神慈悲，好行善行，汝等可潜其左耳。」于是教修容母子闭目，负之而入。神像亦不大，母子处之如一间屋中。老姬朝夕来视。神像耳孔仅容指，凡饮食，至耳孔辄大。一日，盗突入院中，兵器罗列，甚利。修容从耳孔中窥之，甚寒心。一夕，老姬持一人头示修容，曰：「渠魁已斩，余无足虑。」修容问：「何不早行之？」曰：「虽系盗乱，亦天数。然吾小术耳，何敢违天令，天命吾斩则斩耳。」于是用法如前，负而出，归至家。修容拜以为师，誓修苦行以报德。老姬曰：「汝仙骨尚微，无复劳也。」于是教修容作万寿妆，歌连迂曲，后不知所往。修容归于元雍也。

水仙花诗

「花光照流雪，叶影散凝冰。不妨当水步，只虑向空凌。」云窓居士诗也。

新蒲

南华诗云：「姿娇难作牒，力弱讵为轮。」

兰

甘水之傍出玄兰，香闻数里，有子如初生梅实，种之皆生。昔马师皇治龙病，龙负子一函赠之，于是献黄帝，种之苑中。

南华封兰为「世爱君」。

竹

竹名「郁离」，不知所出。偶睹沈诗云：「繁阴上郁郁，促节下离离。」似出于此。又云：「得生君户牖，不顾夹华池。」故南华封竹为「户牖君」。

梅

南华封梅为「寄春君」。

琅琊草

文宾进上以琅琊草十车，可以染绶。

花见羞

明宗同王淑妃看花，一花无风摇动，众叶翻然覆之，明宗笑曰：「此淑妃明秀，花见亦为之羞也。」自后宫中呼为「花见羞」。

倏

成都山有疾兽名「倏」，顷刻万里。

嘉蜂

丽丘出嘉蜂，酿蜜如雪，和诸香为丸，熏衣数年不散。

黄鸟

黄鸟一名「绵蛮」。

鼠

吴兴姚察，少时宿于人家，夜闻一人呼曰「幼卿」，曰「诺」。一人曰：「幼卿视我，岂杀人者哉？今人欲药我，我不能药人乎？」即去。察异之，因效其声呼曰「幼卿」，曰「诺」，曰：「向与而语者何人也？」答曰：「陈二公公，即鼠也。」察曰：「而何人答？」曰：「我床头罽面铜盆也。公平生爱惜物命，当不害我，与主家买我归，能福公，使公至吏部尚书者我也。」明晨闻哭，问其故，乃主人辨色兴，欲会客，食隔宿饭，未尽半盃，即仆地暴死。察乃知其以药毒鼠而为鼠所毒也，遂买其铜盆以归，戒人勿得毒鼠。自后察家日以昌，果仕陈至吏部尚书。今人呼罽面盆为「幼卿」，鼠为「陈二公公」，由此也。

《女红余志》卷下

《诗》曰：「无匪无仪，惟酒食是议。」《易》曰：「无攸遂，在中馈。」则操管握牍非妇人之事，明矣。鄙也不才，性多忧愤，不有吟咏，将成大病，与君倡和，时聊为之，以代药石，非敢言诗，然有愧于古训多矣。昔杨子谓「童子雕虫篆刻，壮夫不为」，然综古文辞者往往不鲜，圣贤不之非，鄙敢借以自解。龙辅识。

中秋

寂寂中秋夜，含情出玉闺。河长看雁远，月皎觉云低。

暮闺

暮归翘首觉愁添，凿壁书生隔翠烟。独向嫦娥再三拜，殷懃为我到郎边。

镜

徐淑古铜镜，背多青绿花。收藏敢轻慢，曾得照秦嘉。

戏示女伴

谁道孤眠苦，孤眠却自强。请看隔宿髻，常是不劳妆。

偶成

绣窗同刺绣，女伴喜天晴。剪刀当日暖，妆镜隐霜明。

晓景

春日映朝霞，新妆出绛纱。开帘惊宿鸟，倚树落危花。

荅外

金徽只自秘，玉匣不曾开。梅花难独弄，袖手待郎来。

送外

榜人櫂舟待，催饭送郎独。谙行郎食性，厨下自谓羹。

夏闺

日斜未理妆，昼长人易倦。回扑砚上蝇，墨花溅团扇。

莲子寄外

莲房新摘袖中携，剖寄青青子数枚。若识心头最清静，莫嫌根脚本污泥。

莲子诗比成，自觉丑甚，戏题此作以解，发君子一笑耳。

书罢题锤字，要君知妾心。虽然非白雪，却是贵黄金。

纪梦

梦中握手说离愁，梦觉欢娱忽已休。安得人生真似梦，华胥蝴蝶共悠悠。

寄外

面约随时改，离情睹物含。君风愁少女，妾卉畏宜男。

书怀

藁砧不可期，莲子空相托。欲寄一封书，惟愁被姑觉。

题书斋

深闺渐老大，始学谢娘诗。描笔题成句，良人事作师。白头惭卓女，团扇愧班姬。岂敢传千载，聊将遣一时。

冬晓

积雪带晴雾，闺中事可夸。曙窗留镜月，寒髻集钗花。

春日

风吹花香熏洞房，白日照镜光射梁。后园草暖双蝶醉，堂前尘落对燕翔。

二 春服初裁绛，寒衣始卸绒。花宿全慵蝶，林摇半暖风。

三侵阶草逾碧，明窗日渐迟。携针睹语鸟，牵断绣床丝。

偶成

阶下莓苔烂熳，墙边竹色萧疎。彩凤绣来有恨，琉璃读外无书。

春日写怀

暖气逼房楹，开帘多鸟声。竹春思笋嫩，地日识泥晴。

睡起

下帙恣午睡，怪杀鸟相呼。起来慵刺绣，窗下理菖蒲。

送外

绿柳千条映远空，郎君欲别思忡忡。顾得化为江上水，与郎直到赤门东。

寄外用前韵

未得相携约尚空，小笺一见一忡忡。妾意原非淥江水，无端只向画桥东。

写怀

初听莺声又燕声，年华不待使人惊。桂花开遍门还掩，风自清时月自明。

寄怀

莫怪书频断，难传恨万端。虽承结发爱，难作比肩看。泪续笺恒

湿，思长笔屡干。临封沾臂血，使识寸心丹。

又

何处最难禁，思君直至今。双鱼浮水面，对鸟下庭心。

恨

背人解素袜，裂断寄郎边。须知销玉骨，无兴步金莲。

荅外

君信问平安，闺中差可欢。竹佳连露倚，云好下阶看。

制履寄外

何物寄殷勤，宫鞋绿锦文。为郎承素足，指日踏青云。

冬至

冬至宵虽短，孤眠恨自长。枕单寒入梦，窓破月窥床。

十一月初四日五鼓纪梦寄外

昨夜有佳梦，驰书报与郎。隔门须是近，有臭必然香。

赠外

远别当霜雪，留郎且过冬。只愁春色里，离恨更重重。

偶成

情弱抽思长，腕娇运笔拙。口诵恐易忘，笺书还自裂。

兰梅诗

兰梅逐候舒，种此欲何如。兰叶堪崇佩，梅花好寄书。

荅外

郎书来问近何如，性癖如郎只似初。忍冷临风因爱雪，抱痾点烛为看书。

寄外读书处

玉人之室隔清洲，日日华笺空自酬。书似岷碑看即泪，人非萱草遇还愁。

山中寄外并序

昔李爽有〈山家闺怨〉，鄙效颦为绝句若干，以寄君观览焉。

泊舟古岸傍，松柏日已昀。本非同心期，空似西陵路。

二 湖色开明镜，峦光列翠屏。双眉不忍画，羞对远山青。

三 一到空山下，同看远俗尘。松枝堪作麈，无计赠情人。

四 若得共此栖，松菊长携手。岸上数株松，何须减五柳。

五 寄郎以山字，得无无解处。得郎一人来，便可成仙去。

六 脚下绣宫鞋，殷勤为郎做。今日贪看山，凤头半已破。

七 跻攀不辞远，微汗湿红粉。万一有桃源，当期郎共隐。

八 山中白日暗，霏霏云雨动。信此非巫山，安能入郎梦。

九 妾在山中来，郎在泪头住。郎若泛舟寻，莫误桃花路。

十 闻郎今日来，日斜何不至。应知篙櫓迟，羡杀云中翅。

十一 利名何足事，山中乐未央。郎如学耕耨，奴便学蚕桑。

十二 茅屋拥红炉，聊在山中宿。枉却几上灯，无书供夜读。

十三 娇儿渐聪慧，出语解人意。促奴须早归，恐爷书又至。

十四 寄郎三片玉，至今无报音。深山多古迹，不得共郎寻。

十五 买舟不论价，但愿舟不迟。归时与郎面，不敢效秋时。

送外

与君非一身，同户恒相忆。而况出门去，宁知南复北。

又

君言游宦向华京，不得临歧一送行。行行惟有杨花路，飞去飞来似妾情。

又为子夜歌

明朝将解缆，叮嘱不曾离。文无识顷刻，不久便当归。

【附】《四库全书总目》

《女红余志》二卷（浙江巡抚采进本）

旧本题龙辅撰。据原序所称，乃武康常阳之妻。序不题年月，不知何许人也。上卷皆采掇新艳字句。阳序称外父为兰陵守元度公后，家多异书，细君女红中馈之暇辄阅之，择其当意者编成四十卷。属余游宦京师，细君精差其最佳者手录之，仅四十之一云云。然皆不着出典，又无一语为诸书所经见，殆《云仙散录》之流。下卷皆辅所作小诗，亦浅弱不足采录。钱希言《戏瑕》称为好事者所依托，则明人已灼知其伪。毛晋乃刻之《诗词杂俎》中，失考甚矣。